

17/10/2002

Penubuhan persatuan anak negeri galak jurang sosial antara pelajar

Hasliza Hassan

PELAJAR di institusi pengajian tinggi (IPT) beranggapan satu persatuan menggabungkan pelajar pelbagai bangsa yang datang dari seluruh negara lebih menggalakkan interaksi dan semangat perpaduan, berbanding persatuan yang hanya dianggotai mereka dari negeri yang sama.

Malah, perbezaan agama serta budaya yang wujud di antara mereka akan menimbulkan perasaan ingin tahu dan akhirnya menukar persepsi negatif yang lahir berdasarkan pemerhatian, bukan persefahaman.

Pensyarah Jabatan Sosiologi dan Antropologi Universiti Malaya, Prof Dr Fatimah Daud, berkata untuk mengelakkan polarisasi dan menggalakkan perpaduan, kelompok etnik perlu dihapuskan.

"Melihat kepada perubahan yang dilalui masyarakat di seluruh dunia, kita perlu membuat penilaian mengenai kedudukan diri dan tidak boleh menganggap kita daripada bangsa atau negara berbeza.

"Ini kerana akan tiba masa di mana setiap orang tanpa mengira keturunan, agama atau negara akan termasuk dalam satu golongan yang dipanggil sebagai masyarakat satu dunia.

"Ini dinyatakan dalam buku bertajuk Global Sociology tulisan Robin Cohen supaya masyarakat bersedia menerima hakikat bahawa mereka bukan lagi milik sebuah negara, tetapi kepunyaan dunia.

"Kenyataan itu mungkin benar kerana sekarang pun, saya sudah mendapat tawaran mengajar di banyak universiti di seluruh dunia kerana mereka tidak anggap saya rakyat Malaysia tetapi milik dunia," katanya.

Sehubungan itu, Dr Fatimah berkata, semangat kekitaan seperti penubuhan persatuan anak negeri di IPT wajar dihapuskan kerana ia hanya akan menggalakkan jurang di antara pelajar.

Beliau berkata, kajian mengenai pembabitan pelajar dalam persatuan bercorak kenegerian menunjukkan mereka lebih suka tidak dilabelkan berdasarkan negeri atau bangsa.

Alasan mereka, kecenderungan bergiat dalam persatuan anak negeri menghadkan pergaulan dan interaksi yang akan berlaku hanya di kalangan pelajar dari kampung, daerah dan negeri yang sama.

Generasi muda juga beranggapan bahawa Malaysia adalah negara mereka dan mahukan identiti mereka dikenali sebagai rakyat Malaysia, bukan orang Kedah, Perak, Selangor, Johor atau Kelantan.

Kajian membabitkan 2,000 pelajar di lima IPT itu mendapati hanya 57.3 peratus yang menyertai persatuan anak negeri manakala selebihnya berpendapat satu persatuan mewakili pelajar mencukupi.

Daripada pelajar yang ditemu bual, 38 peratus menunjukkan minat mempelajari serta memahami budaya bangsa lain seperti bahasa, makanan dan adat resam, kesan daripada interaksi antara mereka.

Dr Fatimah berkata, kesediaan pelajar bergaul sesama mereka adalah bukti bahawa negeri sudah tidak mempunyai sempadan dan pembubaran persatuan anak negeri tidak mendatangkan sebarang kerugian.

Katanya, Perdana Menteri, Datuk Seri Dr Mahathir Mohamad, turut menyuarakan kebimbangan mengenai fenomena pelajar universiti hari ini yang gemar mengasingkan diri mengikut kaum.

"Maknanya, sudah tiba masa persatuan anak negeri dimansuhkan kerana terlalu taksud dengan semangat kenegerian akan mengakibatkan perpecahan.

"Aspek kenegerian dan kedaerahan sudah ketinggalan zaman," katanya.

Lagipun, katanya, persatuan anak negeri sekarang tidak menonjol berbanding dulu di mana ia digunakan sebagai landasan untuk mendapatkan

sokongan demi kepentingan anak asal negeri berkenaan.

Beliau berkata, bagi mereka yang merantau memerlukan rakan dari kampung halaman untuk mendapatkan sokongan moral ketika berada di tempat orang.

Katanya, konsep penghijrahan sekarang dari luar bandar ke bandar besar adalah bersifat global dan generasi muda nampaknya bersedia bergaul dengan sesiapa saja di sekeliling mereka.

Bagaimanapun, katanya, tidak dinafikan masih ada yang terus dibayangi pengaruh kedaerahan, menyebabkan mereka berasa tidak selamat sekiranya gagal berjumpa saudara atau kenalan dari negeri mereka.

Dr Fatimah berkata, dalam kaedah psikologi, seseorang itu perlu kepada sokongan untuk memberi kekuatan kepada mereka dan sokongan biasanya diperolehi daripada ahli keluarga atau kawan dalam kumpulan yang sama.

Katanya, pergaduhan yang berlaku antara kira-kira 100 pelajar Kelantan dan Johor di Kolej Yayasan Melaka (YKM), Batu Berendam bukan dipengaruhi semangat kenegerian tetapi lebih bersifat perbalahan individu.

Katanya, teori yang boleh dibuat berhubung kejadian itu ialah pertengkaran dua individu bertukar menjadi pergaduhan dua negeri apabila pihak berbalah mendapat sokongan rakan senegeri mereka.

"Mungkin juga mereka dicucuk oleh rakan dari negeri lain sehingga menyebabkan pertengkaran kecil menjadi tidak terkawal sehingga berlaku keganasan," katanya.